

Bardill fa strada sco autur

Il terz tom da las istorgias da Ro Ramusch è cumparì quest atun

■ **(anr/vi) Ro Ramusch sa numna la figura principala che Linard Bardill ha stgaffi en ina trilogia. Il lectur po acumpagnar Ro atras las aventuras da sia giuventetgna. L'ultim tom da questas aventuras è cumparì quest'atun.** Il chantautur grischun *Linard Bardill* è enonuschent era sco autur. Cunzunt sias cassetas per uffants vegnan vendidas sco paunets frestgs. La giuventetgna da la Svizra tudestga crescha si cun chanzuns ed istorgias da Bardill. «Gimli der Zwerg» u il «Brumbär Belltrametti» èn figuras che Bardill ha stgaffi per ils uffants. Il 2001 è cumparì «Ro und die Windmaschine». Quai è in cudesch che sa drizza plitost a giuvenils. El raquinta co ch'il giuvenot Ro Ramusch sa metta sin viadi per tschertgar ses bab ch'è svanì cura ch'el era anc in uffant.

Ina fabrica abandonada

Durant sia tschertga chatta Ro Ramusch ina fabrica abandonada. En lezza abita in um vegl che viva ina vita misteriusa. L'um vegl prenda si Ro e fa far el lavurs curiosas. In temp sto Ro dumbrar struvas ad infinitum. Ro vegn tut balurd e bunamain blau da la gritta. Tuttina tegna el la dira. La finala remunerà.

Ro scuviera ina maschina da vent en la fabrica. Questa maschina sto vegnir spigentada cun «fils da nettegiar». Sche la maschina na lavura betg capita ina catastrofa. Per tgi? Quai intervegn Ro Ramusch pir cura ch'el chatta in di «l'auter mund» che sa chatta davos la maschina. Ro entra en «l'auter mund» ed inscuntra là figuras remartgablhas: In taiss che salva la vita a Ro, ina matta in zic impertinenta ch'è la figlia da la regina dad Auro, Timor che discurra adina en ligns. I sa mussa che «l'auter mund» è en privel e che Ro è la suletta persuna che po gidar. Ro sto cumbatter in nausch tiran. El na sa senta inumma betg pipa da far quai. Ma gist quest sentiment e la sinceradad da Ro gidan da surventscher tut ils privels.

Filosofia

Bardill ha tessì blers fils filosofics en ses raquint. Intgins patratgs enonusch'ins ord la bibla u dad outras religius e filosofias. Ro resta, malgrà sias aventuras fantasticas, adina ina figura da charn e saun. El è in mat sco mintg'auter era. El ha temas e n'è betg aparti curaschus. Ro sa fida dentant da ses siemis e da ses sentiments. Quai gida adina puspè el da victorisar ses adversaris.

En il segund tom «Ro und Gambrin» s'inamura Ro en Gambrin, la figlia da la regina d'Auro. Ro suppescha suenter ina lunga odissea in nov cuntrahent da «l'auter mund». Il davos sa mussi che quel cuntrahent era nagin auter ch'ina part interna da Ro sez. Ma Ro ha era da schliar problems cun la fabrica ch'el ha er-

tà da l'um vegl ch'è mort en il fratep.

Drogas


En il davos tom daventa «Ro Ramusch» in um. El tschertga puspè ses bab. In consorzi da cunrababandists sa patrunescha da la fabrica da Ro Ramusch. Ils cunrabandists fan commerzi cun drogas. Il meglier ami da Ro cumenza a prender da tuttas sorts drogas e sa bitta a bandun. Era Ro sa decida da sagiar ina giada drogas. El senta dentant che quellas scurlattan ses tscharvè ch'i na fa betg bain ad el.

Ro scuviera era la vita criva da ses pajais real. Quest pajais ha in guvern repressiv. Glied che pensa auter che la regenza vegn arrestada. Uschia è era il bab da Ro a sias uras vegnì en prashun. Digt vesi ora uschia sco sch'il

bab da Ro fiss vegnì mazzà. Ma il davos chatta il figl tuttina anc ses bab. E Ro vegn era da reconquistar sia fabrica.

Ma la via enavos en «l'auter mund» davos la maschina da vent è da qua d'envi serrada per Ro. «I dat in temp che l'auter mund è avert per intgins da vos carstgauns», declera la princessa Gambrin a Ro en in siemi. Quels ch'èn stads en «l'auter mund» ston dentant acceptar ch'els na pon sco creschids betg pli turnar. Ma las persunas davos la maschina da vent dattan per adina forza a quels che han ina giada gidà ed amà la glied da «l'auter mund».

Linard Bardill: «Ro und die Windmaschine», 2001. «Ro und Gambrin», 2002. «Ro Ramusch», 2003. Chasa editura Neugebauer. Gossau, Turgov. ISBN 3-85195-684-2, ISBN 3-85195-685-0, ISBN 3-85195-686-9.



Dus da trais toms che raquintan las aventuras da Ro Ramusch.